

talak itu, dikira satukah atau tiga?

Jawab: Rasulullah (S.A.W) bersabda yang ertinya:

Ibn ‘Abbās telah berkata: Rukānah pernah mentalak

tiga akan isterinya di suatu majlis, lalu ia sangat

dukacita, maka Rasulullah (S.A.W) bertanya kepadanya:

“Bagaimana engkau talak dia?” Ia menjawab:

“Saya talak tiga. Maka Rasulullah berkata:

“Di satu majlis?” Ia menjawab: Iya! Maka sabda

Rasulullah: “Yang demikian itu hanya (jadi) satu.

Kerana itu ambillah semuanya¹ isterimu kalau engkau

mahu.” Kata Rukānah: Maka saya tarik semula akan

isteri saya.

(Maksud hadis sahih Riwayat Ahmad dan

Abu Yu‘lā)

Satu lagi: Maḥmūd ibn Labīd berkata: Ada orang

khabarkan kepada Rasulullah (S.A.W) tentang seorang mentalak

isterinya tiga talak sama sekali. Maka Rasulullah

berdiri dengan marahnya sambil berkata: “Apakah ia

mahu bermain dengan Kitāb Allah padahal aku masih

hidup di antara kamu?” Hingga seorang berdiri

dan bertanya: Ya Rasulullah bolehkah saya bunuh dia?

(Maksud hadis sahih Riwayat al-Nasā’ī)

Telah berkata ‘Ikrimah: Ibn ‘Abbās pernah berkata:

Apabila (seseorang) berkata: Engkau tertalak tiga, dengan

satu kali sebut, maka iaitu jadi satu (sahaja).

(Maksud hadis sahih Riwayat Abū Dāwūd)

Daripada keterangan tiga hadis yang tersebut zahir

bahawa satu lafaz dengan tiga talak itu hukumnya hanya

satu talak sahaja dan ia boleh rujuk kepada

isterinya semula. Hukuman ini berjalan pada masa

Rasulullah (S.A.W) dan berjalan juga pada masa Khalifah

Abū Bakar dan kemudian berjalan pada masa Khalifah ‘Umar

ibn al-Khaṭāb selama dua tahun beliau memerintah. Kemudian

Khalifah ‘Umar menjadikan hukuman satu lafaz dengan

tiga talak itu menjadi tiga.

Bagaimana ijtihād Sayyidina ‘Umar mengubah hukuman

ini tidaklah diketahui dan tidak pula ada sebutan bahawa

ada sahabat-sahabat yang menegur langkahnya seperti tatkala beliau

menghukumkan tentang mas kahwin yang ditegur oleh

seorang wanita sehingga beliau rujuk di hadapan umum.

Tetapi kerana yang berhak menentukan hukum itu Allah

dan Rasul-Nya maka berpegang kepada hukuman Rasul

Allah yang telah dijadikan beliau dan dijalankan pula oleh

Khalifah Abū Bakar dan demikian juga dalam masa dua tahun

pemerintahan Khalifah ‘Umar itu adalah lebih utama kerana jika

sekiranya asas satu-satu hukum boleh diubah kemudiannya

dengan berubah keadaan maka sudah barang tentu segala

hukuman-hukuman yang telah ditetapkan itu akan berubah pula kerana

keadaan-keadaan. Kerana itu lebih utama berpegang kepada hukuman

Rasulullah iaitu talak tiga dengan satu lafaz itu

hanya satu sahaja hukumnya dan boleh dirujuk!

* * *

Samakah biawak Arab dengan biawak di sini?

a. Mansur bin Abdullah, Kampung Kuala Bekah,

Kuala Terengganu bertanya:

Dabb (biawak) yang dimaksudkan halal oleh

Rasulullah itu adakah *dabb* sebagaimana yang ada di Malaya

kita sekarang ini?

Jawab: Di dalam kitab *Ḥayāt al-Ḥayawān al-Kubrā* ada

menyebutkan dengan panjang lebar akan sifat, kegemaran dan

cara-cara hidup biawak itu. Kesukaannya, kegemarannya

dan hal-halnya tidak berbeza dengan biawak kita di sini.

¹ semula

Saudara boleh periksa perihalnya di dalam kitab *Hayāt al-Hayawān al-Kubrā* di sana disebut dengan jelas sifat-sifat itu yang menurut pendapat kita tidak ada ubahnya sedikit pun dengan yang ada di sini. Kalau saudara gemar memakannya maka menurut ijmak hukumnya halal dan jika saudara tidak mahu memakannya tidak ada orang yang memaksa saudara memakannya kerana yang dipersoalkan tentang hukumnya - bukan tentang memakannya - ini bergantung kepada selera masing-masing.

* * *

Di bawah Koloni dan *Federation*.

a. Hamilin Ayub, Ikhwan 889, Kampung Santubong, Kuching Sarawak bertanya:

Bagaimanakah keadaan kemajuan hidup rakyat Bumiputera negerinya, jikalau negeri itu dijadikan sebuah kerajaan *Federation*; adakah keadaan hidup mereka lebih baik atau tidak daripada hidup di dalam negeri yang bertaraf koloni?

Jawab: *Federation* maksudnya negara kesatuan, di dalam mana perkara-perkara mengenai am disatukan pertadbirannya dan hasil-hasilnya dibahagi untuk negara masing-masing mengikut keadaannya sedang koloni, iaitu negeri jajahan yang tertakluk kuasanya di tangan penjajah untuk mentadbirkannya.

Kemakmuran rakyat adalah bergantung kepada kesungguhan rakyat itu sendiri mendapatkan faedah daripada baik tadbir kerajaan-kerajaan itu sama ada koloni atau *federation* ataupun negara merdeka sekali.

Kalau pentadbirannya bagus dan tersusun baik maka rakyat akan makmur tetapi jika tadbirnya tidak baik rakyat akan menderita sekalipun di dalam negeri merdeka sendiri.

Sebab itulah untuk sesebuah negeri yang belum

ada mempunyai orang-orang yang ahli dalam pertadbirannya² terlebih dahulu melatih orangnya supaya menjadi ahlinya kerana sesuatu kerja kalau tidak dijalankan oleh ahlinya jagalah kebinasaannya.

Lihat sahaja negeri-negeri merdeka, kerana ditadbir oleh orang-orang yang bukan ahlinya maka rakyat menderita, “pemimpin” senang-lenang sehingga akhirnya rakyat berasa lebih senang hidup di bawah penjajahan daripada merdeka sebab nikmat merdeka hanya didapat oleh beberapa gelintir manusia sedang rakyat umum menderita.

Jadi jawapan kepada tuan - makmur hidup sesuatu rakyat terletak bukannya kepada taraf kedudukan pemerintahannya tetapi adalah terletak kepada kemahiran pentadbirnya. Jika ia mahir ertinya rakyat akan senang hidupnya - jika negara ditadbir oleh orang yang bukan ahlinya rakyat menderita.

* * *

(sambungan dari muka 36)

yang berlaku sekarang di dalam dunia bahawa perkara perubahan tidak berlaku lama-lama dan harus kita akan mendengar pula kelak perebutan kekuasaan di antara tentera dengan Sukarno akan berlaku.

Kita lihat sahaja bahawa pada satu masa seorang yang takbur dan musuh Islam itu akan hancur dan kebenaran Islam akan timbul. Lihat sahaja perjuangan *Dār al-Islām* di Indonesia hingga sekarang tidak dapat dipatahkan bahkan terus-menerus berjuang sesudah sepuluh tahun namun Sukarno yang bercakap bergegar-gegar tidak dapat menghapuskannya bahkan perjuangan-perjuangan di Jawa Barat semakin berat dan semakin meluas iaitu apabila mereka mendapat bantuan-bantuan senjata baharu.

Allah tetap akan menolong kebenaran - *inshā Allah!*